



法苑珠林卷第三十八

唐上都西明寺沙門釋道世玄暉撰

感通篇第二十一之一

述意部

敬尋釋教肇自漢明繼至皇唐政流歷代年將六百
輜軒繼接備盡觀方千有餘國咸歸風化莫不梯山
貢職望日來王而前後傳錄差互不同事迹罕述稱
謂多惑雖霑餘潤幽旨未圓夷夏殊音文義頗備推
究聖蹤難以致盡故此土諸僧各懷鬱快時有大唐
沙門玄奘法師慨大道之不通愍釋教之抑泰故以

貞觀三年季春三月吊影單身西尋聖迹從初京邑
漸達沙州獨陟險塞伊吾高昌備經危難時值高昌
王麴氏爲給貨資傳送突厥葉護衙所又被將送雪
山以北諸蕃梵國具觀佛化又東南出大雪山昔人
云葱嶺停雪卽是雪山奘親目覩過此雪山卽達印
度經十年後返從葱嶺南雪山北具歷諸國東歸于
闐婁蘭等凡經一百五十餘國備歷艱辛人里莫比
至貞觀十九年冬初方達京師奉詔譯經兼勅令撰
出西域行傳一十二卷至今龍朔三年翻譯經論未
似奘法師遊國博聞翻經最多依奘法師行傳王玄
策傳及西域道俗住土所宜非無靈異勅令文學士
等總集詳撰勒成六十卷號爲西國志圖畫四十卷
合成一百卷從于闐國至波斯國已來大唐總置都
督府及州縣折衝府合三百七十八所九所是都督
府八十所是州一百三十三所是縣一百四十七所
是折衝府四洲所宜人物別異者並簡配諸篇非此
所明今之所錄者直取佛法聖迹住持別成一卷餘
之不盡者具存大本冀後殷鑒知有廣略矣

聖迹部

西域傳云奘師發迹長安旣漸至高昌得蒙厚禮從

高昌給乘傳送至瞿薩旦那國東境卽漢史所謂于
闐國也彼土自謂于道國也東二百餘里有媯摩城
中有梅檀立像高二丈餘極多靈異光明疾者隨痛
以金薄貼像上痛便卽愈其像本在憍賞彌國是鄔
陀衍那王所造陵空至此國北曷勞落迦城有異羅
漢每往禮之王初不信以沙土塗羅漢乃告敬信者
曰却後七日沙土滿城後二日乃雨寶滿街至七日
夜果雨土填略無遺人其先告者預作地穴從孔而
出時王都城西百六十里路中大磧唯有鼠壞形大
如蝟毛金銀色昔匈奴來寇王祈鼠靈乃夜齧人馬

兵箭斷壞自然走退都城西五里許寺有浮圖高百
餘尺多現光相王感舍利數百粒羅漢以右手舉浮
圖安之函內乃下之無傾動也都城西南十餘里有
瞿室稜伽山此云牛角山有寺像現光明佛曾遊此
爲天人說法山巖石室有一羅漢入滅心定待彌勒
佛其國南界接東女國又從國城西越山谷行八百
餘里至斫句迦國卽是沮渠處也國南有山立多羅
漢塔松林鬱茂石室深淨有三羅漢現入滅定鬚髮
恒長僧常剃之其五印度僧有證果者多止此室又
從國西北上大沙嶺度徙多河

舊名新頭河

行五百里至

佉沙國

舊名踈勒國

其俗生子押頭令匾遮從此南行五

百里至烏鐮國都城西二百餘里至大山嶺上有塔數百年前山崖自崩中有比丘冥目而坐形甚偉大鬚髮下垂覆于肩面國王以酥灌之擊捷椎此比丘高視曰我師迦葉波佛在耶答曰無今始聞已入涅槃又問釋迦佛出世耶告曰已滅度矣卽昇空化火焚身又西南逾大葱嶺八百餘里至竭盤陁國其國東南有大石室二口各一羅漢入滅定已經七百歲其鬚髮長年別爲剃又越三國行四千餘里至達摩鐵悉帝國都城寺內有石像上懸金銅圓蓋衆寶飾

之人有旋遶蓋亦隨轉人止便止四周石壁莫測其然有說聖力使之然也自高昌至於鐵門凡經一十六國人物優劣奉信淳踈具諸圖傳其鐵門者卽是漢之西屏鐵門之關見漢門扇一豎一臥外鐵裹木加懸諸鈴必掩此關寔惟天固南出斯門千餘里東據葱嶺西接波斯南大雪山北據鐵門縛芻大河中境西流卽經所謂博义河其境自分爲二十國不可具列名字各有君長信重佛教僧以十二月十六日安居坐至春分以其溫熱雨多故也又順北下從咀蜜國越十三國至縛喝國土地華博時俗號爲小王

舍城國近葉護南衙也王都城外西南寺中有佛澡
罐可容升許襍色炫曜金石難名又有佛牙長寸餘
廣八九分色黃白而允淨兼有佛掃帚用迦奢草長
二尺餘圍可七寸襍寶飾柄三物齋日法俗所感放
大光明王城西北五十餘里有提謂城王城正北四
十餘里有波利城各有浮圖高三丈許各表靈迹卽
釋迦初成道時元獻蜜麩長者本邑之髮爪塔也又
有佛僧伽胝鬱多羅僧僧脚崎又覆盃豎錫杖次第
立塔又度兩國東南入大雪山至梵衍那國度大雪
山東寺有佛齒及劫初獨覺齒長五寸廣四寸又有

金輪王齒長三寸廣二寸又有商諾迦縛婆

舊云商

傳法第
三師

大阿羅漢鐵鉢可受九升并九條僧伽胝絳

赤色設諾艸皮之所績成以其先世於解夏日持此
艸施僧由此福力所被五百世來於中陰身生恒服
之從胎俱出逐身而長阿難當度時變爲法服受具
已後又變爲九條其齒鉢等並用金緘之羅漢從證
滅定入邊際智以願力故畱袈裟待遺法盡方乃變
壞今已有少損信有徵矣又東入雪山逾黑嶺至迦
畢試國奉信彌勝王恒歲造丈八銀像自修供之王
城東三里北山下有大寺佛院東門南大神王像右

足下有大寶藏近有外王逐僧欲掘取其神冠中鸚鵡鳥像奮羽嗚呼地動王軍皆仆起謝而歸寺北嶺上有數石室亦多藏寶欲私開者卽有藥義舊云夜義變爲師子虵蟲來震怒之室西三里大嶺上有觀自在像誠願者像亦現妙身安言行者城東南四十餘里曷邏怛羅寺大臣所造以名目之浮圖高百餘尺昔臣夜夢令造浮圖從王請舍利也及旦至宮有人持舍利瓶臣畱舍利令人先入乃持瓶登塔覆鉢自開安舍利訖王使追之石已合矣齋日放光流出黑油夜聞音樂王都城西北二百餘里大雪山山頂有龍池山下爲龍立寺塔中有佛骨肉舍利升餘有時煙起或如火猛焰漸滅之時方見舍利狀如白珠繞柱入雲還下塔中城西北大河南岸古王寺中有佛弱齡齒齒長一寸餘又此東南往古王寺有佛頂骨一片廣二寸餘色黃白髮孔分明至大唐龍朔元年春初使人王玄策從西國將來今現宮內供養又此寺有佛髮青色螺旋右縈引長丈餘卷可寸許又西南古王妃寺金銅浮圖高百餘尺舍利升餘每十五日夜旋光繞盤曉入塔中城西南北羅婆路山頂盤石上有塔高百餘尺舍利升餘山北巖泉是佛受山神飯

已漱口嚼楊枝因生今爲茂林寺號楊枝又從龍池東行六百餘里越雪山度黑嶺至北印度界已前並是胡國制服威儀不參大夏名爲邊國蔑烈車

此云垢濁

種也至此方合中道又東行至濫波國卽是印度之北境言印度者卽是天竺之正名亦名身毒賢豆此並訛號北背雪山三垂大海地形南狹如月上弦川平廣衍周萬九千里七十餘國依一王命又東行百餘里逾大嶺大河至那伽羅曷國屬北印度名花氏城城東二里有石塔高三百尺編石峙起雕鏤非常此卽昔時值燃燈佛授記敷鹿皮衣髮布掩泥之地經

劫猶存此無憂王建此石塔每於齋日天輒雨華又城內大塔故基舊有佛齒別塔高三丈餘云從空而來旣非人工寔多靈異城西南十餘里有塔是佛自中印度凌空來降迹處次東有塔是昔值然燈佛買華處又城東二十餘里小石嶺上有塔高二百餘尺東岸石壁大洞穴是龍王所居昔佛於此化龍畱影煥若真形至誠請者乃暫明現塔外方石有佛足迹輪相發光窟西北隅塔者佛經行處又側有髮爪塔窟西石上有濯袈裟文又城東三十餘里有醯羅城中有重閣上安佛頂骨周尺二寸其色黃白髮孔分

明欲知善惡用香泥印之及觀香泥隨心而現又有佛髑髏狀如荷葉色同頂骨有佛眼睛大如柰許清白映徹並用七寶瓶盛前三迹又以寶函盛而緘封有佛大衣細氎黃色置寶函中微有壞相有佛錫杖白鐵作環梅檀為笥寶銅盛之斯五聖迹王令五淨行者執持掌護有須見者稅一金錢請印稅五科寶乃重觀禮彌繁閣西北有小塔而多靈異人以手觸基上塔鈴便大震動又東南山谷行五百里至健陀邏國屬北印度有大論師如脇尊者造毗婆沙處又有菩薩捨千眼處又有佛化鬼子母處又有商莫迦

菩薩舊云瞻子是也 被王射處又有彈多落迦舊云檀特山也山嶺

上是蘇達拏棲隱之所婆羅門捶男女處流血塗地

今現艸木皆同絳色巖間石室妃習定處又有獨角

大仙為女亂處又此城北越山行六百餘里至烏仗

那國此北印度之正國也舊云烏長王都城東五里有大

塔多有祥瑞佛昔作忍仙為羯利此云鬪諍王支解之處

又有方石上佛足迹相放光照寺為天說本生處又

有佛昔聞法析骨寫經處又有昔尸毗迦王割身代

鴿處又有佛昔為慈力王刺血飲五藥義處又大寺

中有刻木梅咄麗耶舊云彌勒菩薩像金色晃朗高百餘

尺是末田底迦阿羅漢所造

舊云末田地羅漢也

羅漢以通力

引匠昇觀史多天三返觀相乃成其好大有靈相不

可具述又隔一國度河至坦义始羅國屬北印度王

都城西北七十里兩山間塔高百餘尺佛昔說慈

氏與世四大藏者此地出一又城北十二里有月光

王塔於齋日常放神光仙華天樂近有癩者於塔禮

懺除穢塗香不久便愈身又香潔卽是昔佛爲戰達

羅鉢刺婆王

舊云月光

以頭施處凡經千施又有伊羅鉢

龍王聽經之池月光挾目之地育王標塔舉高十丈

又有薩埵王子捨身飼虎處以竹自刺血啗獸處地

及艸木今猶絳色又有佛化藥又不食肉處又隔二

國東南登山乘鐵橋千餘里至迦濕彌羅國屬北印

度

舊云剎賓

國內有四浮圖各有舍利一升餘佛滅度後

第四百年有脇尊者年八十方出家證無學果將五

百羅漢來此造鄔波第鑠釋素坦纜藏

舊名優婆提捨論

次

造毗柰耶毗婆沙論次造阿毗達摩論此三論各有

十萬頌凡有六百六十萬言備釋三藏兼有佛牙長

寸半色黃白齋日便放光又有觀自在菩薩立像有

願見者斷食便覩又隔三國東行至那僕底國屬北

印度都城東南五百餘里至暗林寺周二十餘里佛

舍利塔數百千區并石室等有賢劫千佛立此說法
釋迦滅後第三百年迦多衍那舊名迦於此造大智

論寺塔高二十餘丈有四佛行坐迹處又隔四國東

行至秣菟羅國屬中印度舊名摩倫羅國王都城內有三塔

四佛遺迹甚多及舍利子没特伽羅子舊名目連滿慈子

舊名富婁那優婆釐舊名優波離阿難陀羅怙羅曼殊室利等

諸塔每三長月六齋日諸僧尼集供養諸塔有阿毗

達摩眾供養舍利遺塔有習定眾供養目連塔有誦

經眾供養滿慈塔有毗柰耶眾供養優波離塔有尼

眾供養阿難塔有未具眾供養羅怙羅塔有大眾供

養諸菩薩塔尋此諸塔未必遺身但應立像設供呈

唯可知也城東六里有山崖寺是尊者烏波瓊多之所造

中有佛指爪塔寺北有石室室東南二十餘里有大

涸池池側有塔佛曾遊此有獼猴持蜜獻佛令水和

徧眾同飲獼猴喜墮坑而死便生人中池北林中有

四佛行處大有遺迹又隔一國東北四百餘里至窣

祿勒那國屬中印度東境臨菟伽河舊名恒河北接大山

城東南閻牟那河從國西北山中出中境而流都城

東臨閻牟河河西大寺東門外塔佛曾於此說法度

人其側有佛髮爪塔閻牟河東八百餘里至菟伽源

廣三四里東南入海廣十餘里水色滄浪味甘砂細
 隨水而流俗謂福水有沐除罪或有輕命自沈乞願
 生天受樂剋有靈感又隔六國於此東南行至劫比
 他國屬中印度中有天祠十所同事大自在天皆作
 天像其狀人根形甚長偉俗人不以為惡謂諸衆生
 從天根生也王都城東二十餘里大寺側大垣內有
 天帝釋為佛造三道寶階中皆附黃金左以水精右
 用白銀南北而列東西下地是佛從逝多林舊云祇
 陀林
 昇天至善法堂為母三月說法下降處百年已前階
 尚猶在今並沒盡後王倣之猶高七十餘尺上起精

舍石側有柱光潤映現隨其罪福影出柱中育王所
 造階側有浮圖四佛行坐迹處又有佛澡浴處立塔
 其所有佛入室精舍又其側佛經行石基長五十步
 高七尺足可覆處皆有蓮華文又基左右小塔梵王
 所造次前是蓮華尼化為輪王先見佛處佛告尼曰
 非汝先也有蘇部底舊云須
 菩提宴坐石室知諸法空此
 先見吾法身也又從此北行二百里至羯若鞠闍國
 是中印度曲女城也都城西近菟伽河長二十餘里
 廣四五里即統五印度之都王也王前尸羅逸多唐
 云
 日戒吠奢姓初欲登位於菟伽岸有觀自在像乃請告

曰汝本北林蘭若比丘金耳月王旣滅佛法王當重
興愍物在懷方王五境慎勿昇師子座及稱大王號
也王乃共童子王子殄外道月王徒衆又約嚴令有
噉肉者當截舌殺生者當斬手乃與寡妹共知國事
於菟伽側建千餘浮圖各高百餘尺二十年來五年
一會傾及府藏拯濟羣有唯留兵器用備不虞初作
會日集諸國僧三七日中四事供養令相論議若戒
行貞固道德優洽者昇師子座王便受戒清淨無學
示有崇仰穢行彰露者驅出國界城西育王所造
昔佛於此七日說法其側有髮爪塔四佛行坐迹又
南臨菟伽寺有佛牙長寸半光色變改寶函盛之遠
近瞻者日有百千守者煩擾重稅金寶而樂禮者不
辭重貨齋日便出置高座上散華雖積牙齒不沒又
城東南百餘里有塔佛曾七日說法處中有舍利時
放光明其側有佛行坐迹寺北四里臨菟伽河有塔
佛曾七日說法五百餓鬼解悟生天其側又有髮爪
塔次側又有四佛行坐迹又至阿輸陀國屬中印度
都城北五里菟伽河岸大寺中塔佛爲天人三月於
此說法有四佛行坐迹次西五里有佛髮爪塔城西
南五里大庵沒羅林中故寺是阿僧伽菩薩夜昇天

宮於彌勒所受瑜伽莊嚴大乘經論及中邊論等書
下爲衆說之林西北百餘步有佛髮爪塔城東南臨
菟伽有塔佛曾三月說法處有髮爪青石塔有四佛
行坐迹又隔二國東南行至鉢羅伽耶國屬中印度
王城西南臨閻牟河曲中有塔佛曾於此降外道處
有髮爪塔經行迹處又有提婆菩薩作廣百論處城
中有天祠堂前大樹枝葉蒙密有食人鬼依之左右
遺骸爲積人至祠中無不輕命上樹投下爲鬼所誘
城東兩河間交廣十餘里土地平豐細沙彌布古今
王豪諸貴諸有捨施莫不止焉號爲大施場戒日大

王亦修此業場東合流口日數人自溺而死彼俗名
爲生天所也有欲行此法者於七日中絕粒自沈中
流遠近相趣乃至山猿野獸羣鹿等亦遊水濱絕食
沈死當戒日王行施之時有二獼猴雌爲狗殺雄者
負屍擲此河中雄者又自餓累日而死又從此西南
大林野行五百餘里至憍償彌國屬中印度王城內
故宮大精舍高六十尺刻檀佛像上懸石蓋卽鄔陀
衍那王舊云憂陀延之所造也靈光間起諸王以力
欲舉終莫之移昔佛爲母上天說法王請目連神力
接工就天摸相及佛下天像便起迎佛慰喻曰方爲

佛事舍東百餘步四佛行坐迹佛浴室并今猶充汲
城內東南隅有具史羅長者宅有佛精舍髮爪塔有
四佛行坐迹城西九里石室有佛降毒龍處側有大
塔高二十餘丈有佛經行迹及有髮爪塔病求多愈
又有釋迦遺法滅盡在此國中貴賤入境自然感傷
窟東北行七百里度旃伽北岸至迦奢布羅城是護
法菩薩伏外道處佛曾於此六月說法有佛經行迹
及有髮爪塔又從此北行一百八十里至鞞索迦國
屬中印度王城南有寺塔高二十餘丈佛曾於此六
年說法其側有奇樹高七十尺春冬不改是佛淨齒

木葉而茂生諸邪外道競欲殘伐尋生如故伐者受

殃佛四佛行坐迹并有髮爪塔基角相連林池交

影又從此東北五百里至室羅伐悉底國屬中印度

舊云舍衛國也都城荒毀故殿東基上有小塔是鉢羅犀那

恃多王舊云波斯匿唐言勝軍也比丘尼造精舍處次東塔是蘇

達多此云善施之故宅也側有大塔是鴛窶利摩羅此云指髮

捨邪處城南六里許有逝多林是給孤園太子所造

寺也今荒廢之尚有石柱高七十餘尺育王造之甄

室一存餘並湮滅室中有爲母說法金像東北有佛

洗病僧塔西北有目連舉身子衣塔不遠有井塔佛

可汲用又有舍利弗與佛經行道說法處並有表塔
靈樂異香常降其所又有外道殺女以陰謗佛立塔
表處寺東百餘步大溪坑是調達欲毒害佛生身陷
處又南有大坑是瞿伽離比丘毀佛生身陷處又南
八百步大溪坑是戰遮婆羅門女毀謗佛生身陷處
此三大坑皆溪洞達無底縱有洪雨大注終無停偃
寺東七十步有精舍名曰影覆高六十尺中有東面
坐像與外道論處次東天祠量同精舍初日影西不
蔽佛舍晚日蔭東遂覆天祠又東四里大涸池是毗
盧釋迦王舊云瑠璃王也陷入地處後人立記之又有身子

初造寺時與外道搆處亦立塔記寺西北四里有得
眼林中有佛經行迹塔其緣勝軍王挾五百賊眼聞
佛慈力一時平復捨杖遂生城西北六十里故城是
人壽二萬歲時迦葉波佛本生處其北卽是此佛全
身舍利之所育王造塔表記之處又東南行五百里
至劫比羅伐罕堵國屬中印度舊云迦毗羅國故城無人住
城內正殿基上精舍中作王像其側是摩訶摩耶唐云
大夫人寢殿基上精舍作夫人像其側精舍中作菩
薩像神降之相彼執不同上座部云當唐國五月十
五日諸部又云當此土五月八日此蓋見聞之異耳

城南有塔是太子搆力擲象越城墮地爲大坑處其側有精舍作太子像及受業處其傍有精舍是妃寢處作耶輸陁羅并羅怙羅像別本云太子初夜開城北門出去又城東南隅精舍中作太子乘白馬凌空踰城處四城門各有精舍作老病死沙門像城南四里尼拘盧林塔佛得道與夫人說法之所城南五十里故城中塔是人壽六萬歲時迦羅迦村馱佛本生城城東南塔卽此佛遺身處無憂王於前建立石柱高三丈又東北三十餘里故城中塔是人壽四萬歲時迦諾迦牟尼佛本生城城東北塔卽此佛遺身處無憂王爲建立石柱銘記之高二丈餘城東北四十餘里有太子生樹下塔大城西北數百千塔是誅釋子塔有四釋子拒王軍衆璫璃王退城人不受被罰出境至今不絕城南尼拘律樹塔是佛初來見父王處城南門外塔是太子兄弟搆射處東南三十餘里是太子射矢没地因涌泉流俗傳箭泉病飲多愈或持泥附額隨苦皆愈又東北九十里臘伐尼林釋種浴池華水相映其北二十五步有無意華樹今已枯悴佛本誕處有說云當此三月八日者上座部云當此三月十五日者次東有塔二龍浴太子處佛初生

已不扶而行四方各七步所蹈之處出大蓮華既右
脇生天帝衣接四王捧之置金几上几施四塔并立
石柱表之傍有小河東南而流俗號油河是太子產
已天化此池光潤令沐以除風虛今變水河尚膩如
油又從此東行二百餘里荒林中至蓋摩國屬中印
度都城空城東南有佛塔減百尺昔初八分之一分
舍利也靈光時起其側有清池龍變爲虵出繞其塔
有野象採華以散之無憂王欲開龍護不許又東大
林百餘里大塔是太子至此解寶衣中末尼珠付闍
鐸迦還父王處又東有瞻部樹枯株尚在有小塔是
太子以餘衣易麤布處其側塔者剃髮處年自不定
或云十九二十九者又東南行百九十里是拘陀林
塔高三丈是昔人於佛焚地收餘灰炭於此起塔病
者祈愈亦有四佛行坐迹塔高百餘尺左右數百小
塔又從此東北大林踈險行五百里至拘尸那揭羅
國屬中印度城荒人少城內東北角塔是純隨故宅
其井猶美營供所穿城西北四里度阿恃多伐底河
唐云近西岸娑羅林兩林中間相去數十步中有四
有金樹特高作大甗精舍中造涅槃像北首而臥傍高
二百餘尺前有石柱記佛滅相有云當此土三月十

五日者說有部云當此九月八日諸部異議云至今龍朔三年則經一千二百年此依菩提寺石柱記也或云一千三百年或云一千五百年或云始過九百未滿千者其精舍側有佛昔為雉王救火及鹿救生各立一塔次西塔者是蘇跋陀羅唐云善現滅證處次有一塔是執金剛神躡地處次側一塔是停棺七日處次側一塔是阿泥樓陀上天告母降來哭佛處城北度尸連禪那河三百步塔者是佛涅槃般那處唐云焚燒地今黃黑土襍灰炭有所感者剋獲舍利次側一塔佛為大迦葉波現雙足處次有一塔前立石柱刻記

八國分舍利事又從此西南大林行五百里至婆羅

疵廝國屬中印度

舊云波羅柰也

都城西臨菟伽河城居人

滿城東北有婆羅疵河河東北十餘里是鹿野寺又西南塔高百餘尺前有石柱高七十餘尺洞徹清淨誠感像現隨其善惡佛成道已初轉法輪處其側三塔即昔三佛行坐處傍有諸塔是五百獨覺入滅度處又側一塔是慈氏菩薩受記處又西一塔是佛過去為護明菩薩迦葉波佛授今佛成道處次南有四佛經行處長五十步高七尺青石積成上作釋迦經行像其形特異肉髻上鬚髮頭抽出神而有徵寺迹

極多精舍浮圖乃有數百事難述盡寺西有清池周
三百步佛昔盥浴次西小池佛嘗滌器處次北小池
佛嘗有浣衣處次之三池龍止其中味甘且淨有慢
觸者金毗羅獸卽而害之次側有方石上有佛袈裟
文迹外道凶人有輕蹈者池龍輒興風雨害之次側
有浮圖佛曾作六牙象王見獵師者被法衣故拔牙
與處次又一塔佛昔爲象與猴相問大小處又大林
中塔佛與調達昔爲鹿王佛代孕鹿命處鹿野之號
因此得名寺西南三里有一塔是五人迎佛處又大
林東三里有塔佛昔爲兔與諸獸聚自知形小燒身

饋之因感天帝下來讚故使月輪有兔像現又東順
菟伽河行三百里至戰王國都城大滿城臨菟伽河
城西北有寺塔佛舍利一升昔佛於此七日說法并
四佛行處河北有佛降鬼塔半已陷地又有佛爲噉
人鬼說法處又東南度河百餘里塔者卽分舍利瓶
及餘舍利齋日放光又東北度菟伽河行百五十餘
里至吠舍釐國屬中印度舊云毗舍離國都城頽毀故基周
七十里少人居住宮城周五里宮西北六里有寺塔
是說維摩經處又東是舍利子證果塔又東大塔是
王得一分舍利一斛許無憂王取九升均造餘塔後

更有王欲開地震遂止次南有獼猴爲佛穿池池西羣猴持佛鉢上樹取蜜處池南猴奉佛蜜處各有塔記寺東北四里許有塔是維摩故宅基尚多靈神其舍壘甄傳云積石卽是說法現疾處也於大唐顯慶年中勅使衛長史王玄策因向印度過淨名宅以笏量基止有十笏故號方丈之室也并長者寶積宅菴羅女宅佛姨母入滅處皆立表記寺北四里有塔佛將往拘尸天人送往立處次後一塔是佛最後觀城邑處次是菴羅女以園施佛處其側一塔是佛三告阿難涅槃處又側一塔是千子見父母處卽賢劫千

佛也東故重閣講堂基塔時放光明是佛說普門住處城東南十五里大塔是七百賢聖重結集處菴伽河南北岸各有一塔是阿難陀分身與二國處又隔一國西北行一千五百里入山谷至尼波羅國屬北印度都城東南不遠有水火村東一里許有阿耨波泐水周二十步旱澇湛然不流常沸家火投之徧池火起煙焰數尺以水灑火火更增熾碎土以投亦卽然盡無間投者並成灰燼架釜水上煮食立熟賢德傳云此水中先有金匱前有國王將人取之匱已出泥人象挽之不動夜神告曰此是慈氏佛冠在中後

彌勒下生擬著不可得也。火龍所護城南十餘里。孤山特秀。寺居重疊。狀若雲霞。松竹魚龍。隨人馴附。就人取食。犯者滅門。比者國命並從此國而往還矣。卽東女國與吐蕃接界。唐梵相去可一萬餘里。又從南行百五十里。度菟伽河。至摩揭陀國屬中印度城。少人居邑。落極多。故城在王舍城山北。倚東二百四十里。北臨菟伽河。故宮北石柱高數丈。昔無憂王作地獄處。是頻婆娑羅王之曾孫也。王卽戒日之女壻也。所治城名華氏城。王宮多華。故因名焉。石柱南有大塔。卽八萬四千之塔。一數也。安佛舍利一升。時有光瑞。卽是無憂王造。近護羅漢役鬼神所營。其側精舍中有大石。是佛欲涅槃。北趺拘尸南顧摩揭。故踏石上之雙足迹。長尺八寸。廣六寸。輪相華文十指。各異。近爲惡王金耳毀壞。佛迹鑿已還平。文采如故。乃捐菟伽河中。尋復本處。貞觀二十三年。有使圖寫迹來。次側有四佛行坐迹。塔故城東南有龍猛菩薩伏外道處。次北有鬼辨塔。馬鳴事。又西南度尼連禪河。有伽耶城。少人物。可千餘家。城西南六里許。至伽耶山。谿谷杳冥。世謂靈岳。自古君王封告成也。頂有石塔。高百餘尺。時放奇光。佛於此說寶雲等經。山東南尼

連河減二里許至鉢羅笈菩提山唐言正覺佛時證
先登因名也佛自東北崗上頂欲入金剛定振地搖
山神懼告佛又至西南半崖中面間坐石地山又震
淨居天告曰此西南十五里近苦行處畢鉢羅樹下
金剛座處是菩提座三世諸佛咸此成正覺佛方就
之仍爲石室龍留影也世稱名地其菩提樹周垣甃
壘以崇固之東西闊周可五百四十步竒樹名花連
陰列植正門東開對尼連河南門接大花池西阨險
固北門通大寺其院內聖迹諸塔列多樹垣正中金
剛座上者賢幼初成與大地俱大千界中下極金輪
上至地際金剛所成周百餘步千佛同坐入金剛定
故因號焉卽證道之處又曰道場大地震時獨無搖
也如來得道之日互說不同或云三月八日及十五
日垣北門外大菩提寺六院三層垣牆高四丈壘甃
爲之師子國王買取此處與造斯寺僧徒僅千大乘
上座部所住持也有骨舍利狀如人指節舍利者大
如真珠彼土十二月三十日當此方正月十五日也
世稱大神變月若至其夕必放光瑞天雨竒花充滿
樹院彼土常法至於此時道俗千萬七日七夜競申
供養凡有兩意謂觀光瑞及取樹葉其樹青翠冬夏

不改每至入涅槃日及以夏末一時彫落通夕新抽
 與舊齊等後為無憂王妃伐截於西數千步聚而燒
 之用以祠天煙焰未止忽生兩樹猛火之中茂葉同
 榮因謂號為灰菩提樹王覩生信以香乳漑餘根者
 至旦樹生如本王妃忿之又夜重伐王重新請以乳
 灌之不日還生壘石周垣其高丈餘近為金耳國月
 王又伐此樹掘至泉水不盡根底乃縱火焚之又以
 甘蔗澆之令其爛絕其本也數月之後為補刺拏伐
 摩王此言滿胄即先無憂王之玄孫也聞樹被誅舉
 身投地請僧七日經行繞樹大坑以數千牛乳灌之

六日夜樹生丈餘恐後翦伐周峙石垣高二丈四尺

樹今出於石壁上二丈餘圍三尺餘樹東青甆精舍

高百六十餘尺基廣二十餘步上有石鈎欄繞之高

一丈層龕皆有金像四壁鏤諸天仙上頂金銅阿摩

勒迦果此謂寶瓶即寶臺也東却接為重閣三層簷宇特異並

金銀飾鏤三重門外龕中左觀自在右慈氏像並鑄

銀成高一丈許是無憂王造精舍初小後巨廣之依

王玄策行傳云西國瑞像無窮且錄摩訶菩提樹像

云昔師子國王名尸迷佉拔摩唐云功德雲梵王遣二比

丘來詣此寺大者名摩訶誦此云大名小者優波此云其

二比丘禮菩提樹金剛座訖此寺不安置其二比丘
乃還其本國王問比丘往彼禮拜聖所來靈瑞云何
比丘報云閻浮大地無安身處王聞此語遂多與珠
寶使送與此國王三謨陀羅崛多因此以來卽是師
子國比丘又金剛座上尊像元造之時有一外客來
告大衆云我聞募好工匠造像我巧能作此像大衆
語云所須何物其人云唯須香及水及料燈油艾料
旣足語寺僧云吾須閉門營造限至六月慎莫開門
亦不勞飲食其人一人卽不重出唯少四日不滿六
月大衆評章不和各云此塔中狹迤復是漏身因何
累月不開見出疑其所爲遂開塔門乃不見匠人其
像已成唯右妳上有少許未竟後有空神驚誠大衆
云我是彌勒菩薩像身東西坐身高一丈一尺五寸
肩闊六尺二寸兩膝相去八尺八寸金剛座高四尺
三寸闊一丈二尺五寸其塔本阿育王造石鈎欄塔
後有婆羅門兄弟二人兄名王主弟名梵主兄造其
塔高百肘帝造其寺其像自彌勒造成已來一切道
俗規模圖寫聖變難定未有寫得王使至彼請諸僧
衆及此諸使人至誠殷請累日行道懺悔兼申來意
方得圖畫髣髴周盡直爲此像出其經本向有十卷

將傳此地其匠宋法智等巧窮聖容圖寫聖顏來到
京都道俗競摸焚師傳云像右乳上圖飾未周更填
衆寶遙看其相終以不滿像坐跏趺右足跏上左手
歛右手垂所以垂手者像佛初成道時佛與魔王指
地爲證近被月王伐樹令臣毀像王自東返臣本信
心乃於像前橫施甄鄣心愧暗故置燈於內外畫自
在天像功成報命月王聞懼舉身生皴肌膚皆裂尋
卽喪没大臣馳報卽除壁鄣往還多日燈猶不滅今
在深室晨持鏡照乃覩其相見者悲戀敬仰忘返又
依王玄策傳云此漢使奉勅往摩伽陀國摩訶菩提
寺立碑至貞觀十九年二月十一日於菩提樹下塔
西建立使典司門令史魏才書

昔漢魏君臨窮兵用武興師十萬日費千金猶尚北
勒闐顏東村不到大唐牢籠六合道冠百王文德所
加溥天同附是故身毒諸國道俗歸誠皇帝愍其忠
欵遐軫聖慮乃命使人朝散大夫行衛尉寺丞上護
軍李義表副使前融州黃水縣令王玄策等二十二
人巡撫其國遂至摩訶菩提寺其寺所菩提樹下金
剛之座賢劫千佛並於中成道觀嚴飾相好具若眞
容靈塔淨地巧窮天外此乃曠代所未見史籍所未

詳皇帝遠振鴻風光華道樹爰命使人屈斯瞻仰此
絕代之盛事不朽之神功如何寢默詠歌不傳金石
者也乃為銘曰

大唐撫運

膺圖壽昌

化行六合

威稜八荒

身毒替額

道俗來王

爰發明使

瞻斯道場

金剛之座

千佛代居

尊容相好

彌勒規模

靈塔壯麗

道樹扶踈

歷劫不朽

神力焉如

法苑珠林卷第三十八

校譌

第七紙

十二行柰宋南藏作榛

第二十四紙

十四行與宋南藏作語

音釋

輜

于求切

翹

苦菊切

蕃

甫元切

媿

古蒐切

蝟

于位切

蟲似

匾

方緬切

銑

桑轄切

罐

古玩切

盃

北末切

績

則歷切

紡績也

邏

郎佐

切

齡

呂經切

齒

初覲切

峙

池爾切

彫

都聊切

雕

都聊切

筭

古旱切

鑠

書藥切

秣

莫葛切

菟

同都切

涸

下各切

積

資四切

鞞

切

府移

鴛

於良切

窶

其矩切

湮

於真切

掬

古岳切

宰

蘇骨切

踰

羊朱切

蓋

章陵切

嶮

虛儉切

疵

女黠切

饋

求位切

餉

進也

釐

呂支切

頽

徒回切

沘

郎計切

阨

於革切

漑

古代切

艾

灌也

五蓋軫章忍切

蘆芽山比丘福登施贊刻此

法苑珠林第三十八卷 吳江比丘明覺對

真

州趙之昂書 進賢吳國泰刻 萬曆辛卯冬清涼山妙德庵識

法苑珠林卷第三十九

唐上都西明寺沙門釋道世玄暉撰

感通篇第二十一之餘

聖迹部之餘

又樊師傳云佛以唐國三月八日成道上座部云當此三月十五日成道時年三十者或云三十五者斯之差互彼自不同由用曆前後故有此異由神州曆筭元各不同三代定正延縮何足恠乎且據一相取悟便止樹西大精舍內有鍤石像東面立飾以奇珍前有青石奇文如來初成道日梵王起七寶堂帝釋

起七寶座佛據上七日思惟放光照樹令寶爲石樹
南浮圖高百餘尺初佛於河沐已將坐念艸帝釋化
人以始尸艸此云吉以奉佛坐育王造塔表之次東

北有塔是佛證果時有羣青雀來繞世尊亦有羣鹿
呈祥之處樹東大路左右各有一塔是魔王燒佛衰
退處樹西北有精舍中迦葉波佛時放光明俗云至
誠七遶生得宿命智又垣西北有鬱金香泥塔高一
丈四尺樹垣東南隅有尼拘律樹樹側有塔精舍中
有坐像初證果時大梵王請轉法輪處垣內四隅皆
有塔初佛受艸趣樹先至西南地動又向西北又東
北又東南並爲地動卽西北至樹下東面坐金剛座
上地方安靜故立塔記垣外西南有二牧牛女宅處
其側有煮乳糜處又側有佛受糜處皆立表塔樹南
門外大池周七百餘步清澄魚龍所宅次南有池是
帝釋所造爲佛濯衣池西大石是帝釋雪山持來爲
佛曬衣次側有塔是佛納故衣處次南林中一塔是
佛受貧母施故衣處化池東林龍池清潔其水甘美
岸西有小精舍中像佛初成道此坐七日入定龍王
遶佛七帀化多頭蓋佛處龍池東林精舍作佛羸瘦
形像其側有經行迹七十餘步南北各有畢鉢羅樹

往來攀而後起卽是苦行六年日食一麻一麥處今有疾者以香油塗像多愈又有五比丘住處又東南有塔是佛入尼連河浴處次近河有佛食乳糜處其側有二塔是長者獻蜜麩處樹東南塔是四天王奉佛石鉢處其側有塔是佛成道後爲母說法處又度迦葉兄弟千人處樹垣北門外卽是摩訶菩提寺庭宇六院觀閣三重周垣高五丈有佛舍利大如指節光潤鮮白通徹內外肉舍利者大如青珠形帶紅色每年至佛大神變月出以示人卽印度十二月三十日於唐國當正月十五日於此之時放光雨華大起

淡信其寺常有千僧習大乘上座部法儀清肅是南海僧伽羅國王請立經今四百年寺多有師子國人每年比丘解安居訖四方道俗百千萬衆七日七夜香華妓樂徧林供養印度諸僧以唐國五月十六日入夏安居以唐國八月十五日解夏斯亦隨方用曆不同不可一定如雪山北有國坐春坐秋者意以一年之內多溫熱處制三月住就中前後一月延促不定若據修道何時不安故律制三時遊行通結有罪必有善緣亦開兼濟樹院東度河大林中塔北池者佛昔爲香象子侍育象母處前建石柱昔迦葉波佛

於此宴坐側有四佛行坐迹林中小石柱是鬱頭藍發惡願處又東度黃河百餘里至屈屈吃播陁山舊名

雞足直上三峯狀如雞足頂樹大塔夜放神炬光明通

照卽大迦葉波於中寂定處也初佛以姨母織成金

縷大衣袈裟傳付彌勒令度遺法四部弟子迦葉承

佛教旨佛涅槃後第二十年捧衣入山以待彌勒山

路極梗澀多諸林竹師子虎象縱橫騰倚奘法師至

彼每思登踐取進無由奘乃告王請諸防援蒙王給

兵三百餘人各備鋒刃斬竹通道日行十里爾時彼

國聞奘往山禮拜士女大小數盈十萬奔隨繼至共

往雞足既達山阿壁立無路乃縛竹爲梯相連而上

達山頂者三千餘人四睇欣然轉增喜踊具覩石鐸

散華供養又依王玄策傳云粵以大唐貞觀十七年

三月內爰發明詔令使人朝散大夫行衛尉寺丞上

護軍李義表副使前融州黃水縣令王玄策等送婆

羅門客還國其年十二月至摩伽陀國因卽巡省佛

鄉覽觀遺蹤聖迹神化在處感徵至十九年正月二

十七日至王舍城遂登耑闍崛山流目縱觀傍眺罔

極自佛滅度千有餘年聖迹遺基儼然具在一行一

坐皆有塔記自惟器識邊鄙忽得躬覩靈迹一悲一

喜不能裁抑因銘其山用傳不朽欲使大唐皇帝與日月而長明佛法弘宣共此山而同固其辭曰

大唐出震膺圖龍飛光宅率土恩覃四夷化高三五德邁軒羲高懸王鏡垂拱無為其道法自然儒宗隨

世安上作禮移風樂制發於中土不同葉裔釋教降此運於無際其神力自在應化無邊或涌於地或降

於天百億日月三千大千法雲共扇妙理俱宣其鬱乎此山奇狀增多上飛香雲下臨澄波靈聖之所降

集賢懿之所經過存聖迹於危峯竚遺趾於巖阿其參差嶺嶂重疊巖廊鏗鏘寶鐸氛氲異香覽華山之

神蹤勒貞碑於崇崗馳大唐之淳化齊天地之久長其

又焚師傳云從此山東行六十里至矩奢揭羅補羅城北門外有塔佛舒手現五師子伏提婆醉象處又

東北塔是舍利子聞馬勝比丘說法證聖處塔北大坑傍塔是室利毘多設火坑以害佛處又東至姑栗

陀羅矩吒山此云鷲峯亦云鷲臺舊云耆闍崛山傍有大石高丈四五廣三十餘步是提婆達多擲佛處其南崖下有塔佛

此處說法華經處南山崖有大石室佛舊入定阿難別室被魔怖之以手通石摩頂現有通穴精舍東北

大石是佛曬衣處衣文明徹石內傍有佛迹山城北門西有毗布羅山西南崖昔有五百溫泉今猶數十泉西畢鉢羅石室佛昔恒居後壁洞穴是阿素洛宮山北門外一里至迦蘭竹園精舍東大塔是阿闍多没吐路唐云未生怨也即是阿闍世王也竹園西南六里許南山陰大竹林中有大石室是大迦葉波與千羅漢於此集三藏處僧中上座即號為上座部石室西北塔是阿難受責證果處山城之北可五里許至曷羅闍姑利嗚唐言新王舍城南門外道左塔者度羅怛羅處又北三十餘里至那爛陀寺唐云施無厭寺瞻部洲中

寺之最者勿高此矣五王共造供給倍隆故因名焉其寺都有五院同一大門周閭四重高八丈許並用甃壘其最下壁猶厚六尺外墉三重牆亦甃壘高五丈許中間各遶極深池塹備有華香嚴麗可觀自置已來防衛清肅女人妬濫未曾容隱常住僧眾四千餘人外客道俗通及邪正乃出萬數皆周給衣食無有窮竭故復號施無厭也中及左右聖迹重疊不可殫記有諸論師智識清遠王給封戶乃至十城漸降量賞不減三城其寺現在受封大德三百餘人通經已上不掌僧役重愛學問諮訪異法故烏耆已西被

於海內諸出家者皆多義學任國追師都無隔礙王雖守國不敢遮障又東行入山二百餘里至伊爛拏國見佛坐迹入石寸許長五尺二寸廣二尺一寸有瓶迹没石寸許八出華文都似新置有佛立迹長尺八寸強闊六寸許又隔七國西北行至羯羅拏國邪正兼事別有三寺不食乳酪是調達部僧也又西南行七百里至烏荼國東境臨海有發行城多有商旅停於海濱次南大海中有僧伽羅國謂執師子是也相去約指二萬餘里每夜南望見彼國中佛牙塔上寶珠光明騰焰暉赫現於天際又西南行具經諸國

並有異迹可五千里至憍薩羅國卽南印度之正境

也崇信彌篤王都西南三百餘里有黑蜂山是昔大

王爲龍猛菩薩造立斯寺

舊云龍樹

其寺上下五重鑿石

爲之引水旋注多諸變異沿彼達上今淨人固守罕有登者龕中石像形極偉大寺成之日龍猛就山以藥塗之變成紫金世無等者又有經藏甲傳無數古老相傳盡初結集並現存存雖外佛法屢遭誅殄而此一山住持無改近有僧來於彼夏坐但得讀誦不許持出具陳此事但路幽阻難可尋問又南行至案達羅國屬南印度都城西南二百餘里孤山嶺上石

塔卽是陳那菩薩造因明論處又南行千里至馱那
 羯磔迦國屬南印度都城東西據山間各有大寺昔
 王爲佛造殿山踈石製極華博賢聖遊息佛滅未有
 千年前其處有千凡僧安居罷日皆證無學凌空飛
 去今寂無人其處有婆毗吠伽論師唐云明辯卽是般若
 燈論主也於觀自在前絕粒而飲水三年立志祈請
 待見彌勒觀自在乃爲現色身又在城南大山巖執
 金剛神所誦金剛呪三年神授方云此巖石內有阿
 素洛宮如法祈請石壁當開可卽入中待彌勒出我
 當相報又經三年然呪芥子擊於石壁豁卽洞開時
 百千衆觀觀驚歎論師跨門再三顧命唯有六人從
 入餘者謂是毒蛇窟也當卽石門還合如壁又復南
 行六千餘里至秣羅矩吒國卽瞻部最南際海濱境
 也山出龍腦香及有白檀香樹又有羯薩羅香樹松
 身無葉香如冰雪卽龍腦香也從此南大海中有天
 宮觀自在菩薩常所住處舊云觀世音菩薩也臨海有城卽是
 古師子國入海中可三千里非結大伴則不可至自
 此西北四千餘里中途經國具諸神異國東南隅數
 千里那羅瞿羅洲人長三尺鳥啄唯食椰子又至摩
 訶刺他國其王自在未賓戒日寺有百餘僧徒五千

東境山寺羅漢所造有大精舍高百餘尺中安石像長八丈餘上施石蓋凡有七重虛懸空中相去各三尺禮謁見者無不歎異傳云羅漢願力所持或云藥呪術力所持又越二國西北至摩臘婆國屬南印度都城西北二十餘里有大婆羅門邑側大陷坑水流無滿是昔大慢婆羅門謗大乘生陷入地獄處又西北至阿吒釐國屬南印度此國出胡椒熏陸香樹葉如棠又周巡西北越十餘國至波刺斯國非印度所攝此國多出金銀鍮石頗胝水精死多棄屍佛鉢在王宮中西北接拂壇國出白狗子本赤頭鴨生於穴中案梁貢職圖云去波斯北一萬里西南海島有西女國非印度攝拂壇年別送男夫配焉略陳聖迹依如前述具列俗紀備存大本頌曰

希音遠流

乃眷東顧

欣風慕道

仰規西度

妙盡毫端

運微輕素

託采虛凝

殆映霄霧

迹流衆像

理淡其趣

寄興開襟

引凡聖路

千佛同化

萬賢來曙

皇情有感

緇素同遇

住持篇二十二之一

述意部

夫法不自弘弘之在人人通邪正法逐人訛將欲住持三寶必須德行內充律教一宗兼先諳究不憚勞苦不好聲譽令遐邇道俗欣心有據界中行者慕崇進業緇素相依法得久住故四分律云非制不制是制便行如是漸漸令法久住若法出恒情言無規矩翻同鄙俗何成匡衆宜自私退省已爲人故律云非制而制是制便斷如是漸漸令法速滅數見朝貴門首多有療病僧尼或有行醫針灸求貪名利或有誦博歌戲不護容儀或有婚姻相託媒嫁男女或有科

斂酒肉公然聚會或有服玩奢華馳騁衣馬或有執腕抵掌類同賤俗或有結構惡友朋伏麤人致使穢響盈路汙染俗情貴勝同知聞徹天聽於是雷同總撥枉濫清人非直僧尼不依聖教亦由白衣不識賢良寔因一二凡僧毀謗無量好衆或有勤求學問博知三藏或有講道利生無闕四時或有專居禪思常坐不卧或有讀誦經論常勤匪懈或有六時行懺晝夜行道或有納衣乞食儉素無爲或有山居蘭若頭陀苦行或有專營福利供養三寶或有興建齋講化俗入道或有營造經像締構伽藍如是略列疇能殫

撰述
記此之名德常依道場專行福智寸陰不遺無暇染俗或以公貴不識唯其鄙徒結友情密染習既久以非爲是縱覩聖僧將爲凡衆唯生瞋慢何曾加敬靜思此事豈非濫歟

治罰部

自大聖西隱正教東流佛法付囑國王令加護持但王法寢移日就衰羸持犯憲章漸將殆盡若聞說者反被凌辱以道俗濫惡情乖日久設欲治罰改惡就善恃官勢力枉墜清人僧衆無力反汗淨心其懷轉姦實難挫伏致使大教息用遺風訛替故大集經云若未有諸王四姓爲護法故能捨身命寧護一如法比丘不護無量諸惡比丘是王捨身生淨土中若隨惡者是王無量世中不復人身王等不治則斷三寶奪衆生眼雖無量世修施戒慧則爲滅失又犯過比丘應須治者一月兩月苦使或不與語不與共坐或擯出一國乃至四國有佛法處治如是等惡比丘諸善比丘安樂受法故使佛法久住不滅又薩婆多論云違王制故得突吉羅罪又勝鬘經云世尊應折伏者而折伏之應攝受者而攝受之何以故以折伏攝受故令正法得久住天人充滿惡道減少於如來所

轉法輪而得隨轉。又涅槃經云：善男子，諦聽諦聽，當爲汝說。如來所得長壽之業，菩薩以是業因緣，故得壽命長，欲得長壽，應當愍念一切衆生，同於子想。生大慈大悲，大喜大捨，受不殺戒，教修善法，亦當安置一切衆生於五戒十善，復入地獄餓鬼畜生阿修羅等一切諸惡趣，拔濟是中苦惱衆生，脫未脫者，度未度者，未涅槃者，令得涅槃，安慰一切諸恐怖者。以如是等業因緣，故菩薩則得壽命長遠，於諸智慧而得自在。隨所壽終，生於天上。迦葉菩薩白佛言：世尊，於佛法中有破戒者，作逆罪者，毀正法者，云何當於如是等人，同子想耶？佛告迦葉：善男子，譬如國王諸羣臣等，有犯王法，隨罪誅戮，而不捨置，如來世尊，不如是也。於毀法者，與驅遣羯磨，訶責羯磨，置羯磨，舉罪羯磨，不可見羯磨，滅擯羯磨，未捨惡見羯磨，善男子，如來世尊，與謗法者，作如是等降伏羯磨，爲欲示諸行惡之人，有果報，故我涅槃已，隨其方面，有持戒比丘，威儀具足，護持正法，見壞法者，卽能驅遣訶責，徵治。當知是人得福無量，不可稱計。乃至若善比丘，見壞法者，置不訶責，驅遣舉處，當知是人佛法中，怨若能驅遣訶責，舉處是我弟子，真聲聞也。又云：如來今

以無上正法付囑諸王大臣宰相比丘比丘尼優婆塞優婆夷是諸國王及四部衆應當勸勵諸學人等令得增上戒定智慧若有不學是三品法懈怠破戒毀正法者王者大臣四部之衆應當苦治又經云若有比丘供身之具亦當豐足復能護持所受禁戒能師子吼廣說妙法謂修多羅乃至阿浮陁達磨以如是等九部經典爲他廣說利益安樂諸衆生故唱如是言涅槃經中制諸比丘不應畜養奴婢牛羊非法之物若有比丘畜如是等不淨物者應當治之如來先於異部經中說有比丘畜如是等非法之物某甲

國王如法治之驅令還俗若有比丘能作如是師子吼時有破戒者聞是語已咸共瞋恚害是法師是說法者設復命終故名持戒自利利他以是緣故我聽國主羣臣宰相諸優婆塞等護說法人經中廣明覺德比丘護正法時制諸比丘不得破戒畜非法物破戒徒衆聞是語已便來害之時有國王名曰有德沒命護持覺德比丘與其戰鬥救得法師從是之後常得值佛乃至二人皆得成佛自指云爾時王者則我身是說法比丘迦葉佛是爲護法故皆得成就是金剛身又云我涅槃後濁惡之世國土荒亂互相抄掠

人民饑餓爾時多有爲饑餓故發心出家如是之人
名爲禿人是禿人輩見有持戒威儀具足清淨比丘
護持正法驅逐今出若殺若害迦葉菩薩白佛言世
尊是持戒人護正法者云何當得遊行村落城邑教
化善男子是故我今聽持戒者依諸白衣持刀杖者
以爲伴侶若諸國王大臣長者優婆塞等爲護法故
雖持刀杖我說是等名爲持戒雖持刀杖不應斷命
若能如是卽得名爲第一持戒又云我於經中亦說
有犯四波羅夷乃至微細突吉羅等應當苦治衆生
若不護持禁戒云何當得見於佛性一切衆生雖有
佛性要因持戒然後乃見因見佛性得成阿耨菩提
又偈云

比丘若修集 戒定及智慧 當知則不久
親近大涅槃

又月燈偈云

雖廣讀衆經 恃多聞毀禁 多聞不能救
破戒地獄苦

又十輪經佛說偈云

有眞善刹利 供養於正法 三乘得熾盛
當獲功德海 具足七寶等 徧滿閻浮提

持用施諸佛 其福猶有限 乃至四天下
造僧房供養 彼雖得大福 不如護正法
假使爲諸佛 滿中造塔廟 彼雖得大福
不如護正法 譬如五日出 能竭於大海
若護我法者 則竭煩惱結 譬如風災起
悉摧一切山 若護正法者 亦滅諸煩惱
譬如水災起 漂蕩壞大地 若護正法者
亦消諸煩惱

思慎部

夫欲成大醫弘其三藏先須當機自療已患然後治
他法得久住不得爲名利故空談名教不修一行遂
同狂醉故大莊嚴論云有二種醉一者家色財等成
就時醉二者他稱讚時醉此之二醉前一多是在家
人等富貴時醉開放逸門造地獄因後一多是出家
人等貪學名利輕賤自身希望他讚便生憍慢昏於
志趣失於聖意盲不見道流浪三塗故涅槃經云佛
告迦葉我般涅槃七百歲後是魔波旬漸當沮壞我
之正法譬如獵師身服法衣魔王波旬亦復如是作
比丘像比丘尼像優婆塞優婆夷像亦化作須陀洹
身乃至化作阿羅漢身及佛色身魔王以此有漏之

形作無漏形壞我正法又經云若有比丘以利養故
爲他說法是人所有徒衆眷屬亦効是師貪求利養
是人如是便自壞衆又云若有比丘雖持禁戒爲利
養故與破戒者坐起行來共相親附同其事業是名
破戒亦名襍僧又云復有常沒非一闡提何者是也
如人爲有修施戒善是名常沒故經云善男子有四
善事獲得惡果何等爲四一者爲勝他故讀誦經典
二者爲利養故受持淨戒三者爲他眷屬故而行布
施四者爲非想非非想處繫念思惟是四善事得惡
果報又云是一闡提滅諸善根非其器故假使是人
百千萬歲聽受如是大涅槃經終不能發菩提之心
所以者何無善心故又經云善男子我涅槃後無量
百千歲四道聖人悉復涅槃正法滅後於像法中當
有比丘像似持律少讀誦經貪嗜飲食長養其身身
所衣服麤陋醜惡形容顛顛無有威德放畜牛羊擔
負薪艸頭鬢髮爪悉皆長利雖服袈裟猶如獵師細
步徐行如猫伺鼠常唱是言我得羅漢多諸病苦眠
臥糞穢外現賢善內懷貪嫉如受啞法婆羅門等實
非沙門現沙門像邪見熾盛誹謗正法如是等人滅
壞如來所制戒律正行威儀說解脫果雜不淨法及

壞甚深祕密之教各自隨意反說經律而作是言如
來皆聽我等食肉飲酒自生此論言是佛說互共諍
訟各自稱是沙門釋子善男子爾時復有諸沙門等
貯聚生穀受取魚肉手自作食執持油瓶寶蓋革屣
親近國王大臣長者占相星宿勤修醫道畜養奴婢
金銀襍寶與諸技藝畫師泥作造書教學種植根栽
蠱道呪幻和合諸藥作唱妓樂香華治身擣菹圍碁
諸工巧等若有比丘能離如是諸惡事者當說是人
真我弟子若反習是事親近國王王子大臣及諸女
人高聲大笑或復默然於諸法中多生疑惑多語妄
說長短好醜或善不善好著妙衣如是種種不淨之
物於施主前躬自讚歎出入遊行不淨之處所謂沽
酒姪妖博奕如是之人我今不聽在比丘中應當休
道還俗役使譬如稗糶悉滅無餘當知是等經律所
制悉是如來之所說也若有隨順魔所說者是魔眷
屬若有隨順佛所說者卽是菩薩乃至經云破戒比
丘當於百千億萬劫數割截身肉以償施主若生畜
生身常負重所以者何如析一髮爲千億分破戒比
丘尚不能消一分供養況能消他衣服飲食臥具醫
藥又云樂視婦女不附男子乃至憎持戒者親附破

戒常讚布施不讚持戒忍辱精進禪定智慧不讚寂滅遠離獨處常好譏論持戒者過亦不稱讚行頭陀者或指其事惡口橫加又經云善男子如來正法將欲滅盡爾時多有惡行比丘不知如來微密之藏懶惰懈怠不能讀誦宣揚分別如來正法譬如癡賊棄捨真寶擔負艸蕘不解如來微密藏故於是經中懈怠不勤哀哉大險當來之世甚可怖畏苦哉衆生不勤聽受是大乘典大涅槃經唯諸菩薩摩訶薩等能於是經取真實義不著文字隨順不逆爲衆生說復次善男子如牧牛女人爲欲賣乳貪利多故加二分水轉賣與餘牧牛女人彼女人得已復加二分轉賣與近城女人得已復加二分復轉賣與城中女人彼女人得已復加二分詣市賣之時有一人爲子納婦當須好乳以贍賓客至市欲買是賣乳者多索價數是人答言汝乳多水不直爾許正直爾許我今贍待賓客是故當取取已還家煮用作糜都無乳味雖復無味於苦味中千倍爲勝何以故乳之爲味諸味中最善男子我涅槃後正法未滅餘八十年爾時是經於閻浮提當廣流布是時多有諸惡比丘抄掠是經分作多分能滅正法色香美味是諸惡人雖復讀誦如

是經典滅除如來深密要義安至世間莊嚴文飾無
 義之語抄前著後抄後著前前後後著中中著前後當
 知如是諸惡比丘是魔伴侶受畜一切不淨之物而
 言如來悉聽我畜如牧牛女多加水乳諸惡比丘亦
 復如是唯以世語錯定是經令多衆生不得正說正
 寫正取尊重讚歎供養恭敬是惡比丘為利養故不
 能廣宣流布是經所可分流少不足言如彼牧牛貧
 窮女人展轉薄淡無有氣味雖無氣味猶勝餘經足
 一千倍如彼乳味於諸苦味為千倍勝何以故是大
 乘也 大涅槃經於聲聞經最為上首喻如牛乳味中

最勝以是義故名大涅槃

法苑珠林卷第三十九

校譌

第六紙

五行妬宋南藏作垢

第十三紙

十三行今疑當作令

音釋

嫖

而沼切擾亂也

罅

呼嫁切孔也

懿

乙冀切美也

竝

除呂切立也

趾

諸市切

也

鏗

口莖切金玉聲也

姑

渠乙切

磔

陟革切

跨

苦化切距也

塲

過切

力感

曙

常恕切

菹

薄胡切

腕

烏貫切

締

丁計切

稊

切

云九切

禾

麥

羊卽切

下

歲草也

蘆芽山比丘福登施贊刻此 法苑珠林第三十九卷 吳江比丘明覺對 真州趙之昂書 上元周天祚刻 萬曆辛卯冬清涼山妙德庵識

國

